

missier Batista Polani, che era stato la notte con mi a vellizar, et che haveva tenuto quella medema marinarezza de andar a secho, et *similiter* missier Michiel Morexini, sono intrati im porto. El Marin, el qual vene per intrar in Faro, et per esser notte et el suo comito bestial, che non volsse far a seno di peota ni di patron, le bote de mar l' à getato in terra, su l' isola, lontan dal Faro uno mio, fora del porto; vero è, che la galia è in spiazza integra, et ha soto una giara, che quasi li seusa un leto *etc.* Fin hora non è rota; se ha cavato fora tuto el pan, munition e ogni altra cossa, et li ho mandato el mio scrivano con le maistranze, per veder di ajutarla; non se li mancherà di cossa alcuna. Del resto de l' armada nui non sapemo nova alcuna, salvo del provedador et una altra galia, che è stà dito esser l' altro Polani, ch' è a Lipari, e fin horra non è parse, per esser stà ancor fortuna da eri in qua, che prima quelle do se tien certo per salve; le altre ponno esser andate, chi a Napoli, chi per la Calabria, chi atorno l' ixola; e Dio voglia non sia alcuna, che habi patito mazor danno che la . . . . ., e' sia sola, che reputerò una gran gratia da Dio. A la fortuna havemo hauto, io confesso esser stà in mazor certeza de perir, che speranza de salvarmi; le oratione de quelli da Venetia et vodi fati judicho ne habi salvato. Vero è, che non credo mai usissè fora di l' arsenal la mior galia de fortuna di questa. Il comito si ha portato da valente homo, el paron et maistranze et compagni hanno fatto el debito suo, e uno peota, vechio, che ho sempre tenuto in galia, che fo in Cypri, fino al tempo andò la benedeta anima de la rezina, mi ha ajutato assai. Con l' ajuto de Dio son qui im porto; aspeterò el provedador, et, possando, darò ogni favor per ajutar la galia del Marin, nè mi moverò, fino el provedador non venga. Da questi de la terra non havemo possuto haver ajuto nè favor; nè hanno lassato mandamo in terra persona alcuna. Quello seguirà, vostra magnificentia l' intenderà. Ho fato questa letera, perchè dúbuto non sia scritto a Venetia sia persa, azò vostra magnificentia intenda la mia salute, insieme con Hironimo e la galia. Vero è, che non curo se sapia de dita letera, azò la brigata non dagi fastidio a vostra magnificentia di domandar di soi, et *etiam* che io sia quello dagi cativa nova, non sapendo cossa alcuna, salvo del Morexini, Polani, Griega, ch' è im porto, Marin, ch' è sopra la mia galia, et le zente et robe salve di la sua galia, provedador e l' altro Polani, ch' è a Lipari; di altre non so nulla. Ho paura dil Falier, per esser galia vechia, et per haver tratto la nocte 5 colpi di artelarie. Dio

lo ajuti, che credo ne haverà habuto bisogno! Del mio sferdimento grandò, che già 15 zorni ho auto, non parlo, perchè la notte e el zorno stavo su la pope, et piú fiade le bote de mar mi ha lavato la testa fino ai piedi, et in questo tempo non l' ò temuto; horra, ch' io son im porto, mi ha dato qualche fastidio, pur spiero starò bene. E niun se doni fastidio, che, da poi havemo schapolato questa fortuna, non podemo piú perir. Vostra magnificentia potrà dir a mia madre, quello li parerà, per non darli fastidio; ma, sopra tutto, che io credo piú le sue oratione mi habi salvato che altra cossa; in che la prego la perseveri. La fortuna è stata da luni a mezo zorno, che fo a di 30, fino mercore a horre 3 de di, che intrassemo im porto, che galie grosse et nave saria stà asai. Non dirò altro, per non saper scriver, et haver roto caramali, veri et quasi ogni cossa. Vostra magnificentia mi perdona.

Data im porto, di Faro di Messina, a di 2 zener 1510.

Da poi retenuta fin questo zorno 4 dil mexe, che, per non haver messo, non l' ò mandata, l' è zonto qui in Faro el provedador, Michiel, Garzoni, Zorzi, Zen. Et se ha saputo la certeza de la rota del Falier, il qual, luni, a hore 7, se investì con el provedador, et se aperse; *tamen* tutto el marti, fino a tre hore di notte, navegò, ancor che la galia fosse meza di aqua, et vene lontan da Stromboli cerchando mia, et li andò a fondi. De la qual galia è schapolato el comito e da 5 compagni; el resto, tra balestrieri, galioti, el capelam, al numero de XX, el patron, nobeli et tutti li altri sono anegati, ch' è stato un gran pechato, che, oltre el danno publico, la qualità del patron era di sorte, che dia doler a ciaschaduno, per la bona sua condition; non se li pol far altro, salvo pregar Dio li perdoni. El Marin spiero si trazerà fora di terra, et navigarà; el mio scrivano se à fatichà per trazerla fora, et dice di farlo, che assai mi piace per molti respeti. Del Guoro, Tiepolo et Dandolo non se intende nova alcuna; si sta con gran sospeto, non li sia intravenuto mal; che Dio non lo voglia! L' Emo et missier Andrea Polani sono a Melazo, salvi. Non altro.

A vostra magnificentia mi ricomando.

*Subscriptio:*

FRANCISCUS CORNARIO, *filius.*

A tergo: *Clarissimo domino Georgio Corne-*